

Manuela Ladurner nuova prescienta de L'Union dei Ladins da Fodom

Daniela Templari la passa la mán. Vize Luigina Dorigo

Union dei Ladins - Novité ntel consei de L'Union dei ladins da Fodom. La prescienta Daniela Templari l'a lascé l'enciaría a Manuela Ladurner. Chèst chël che l'é vignù fora da le votazion del nuof consei che l's'è biné nchëstadi. "Rengrazie duc chi che m'ha daidé nte sti agn del mio mandat" l'a dit la Templari davò avei fat a savei ai consiadous che la no s'assa ricandidé per autri trei agn a visé l'associazion. Manuela Ladurner, titular de n'ativité turistica sun jou de Pordou, l'a a le spale na longia esperienza da consiadou de L'Union dei Ladins. N particolar l'é stada davò a la publicazion de libri suora i guànc e le speide da nzacan bele dei fòra o che vignarà prejentei

decannavò da L'Union. Nte sti ultimi agn l'a tout pèrt a l'ativité de la Generela come raprejentánt de Fodom auna a la prescienta Daniela Templari. Da trèa apasionada de la cultura ladina (l'é stada per agn ence ntel Grop da Bal a Fodom), per sti trei agn la nuova prescienta la podarà se mpoié su nen consei joven e motivé, n gran pert renové e "n rosa" (demè trei i consiadous ëi), che

l'é ste voté n ocazion del "Davòmesdi Fodom. Manifestazion



Manuela Ladurner, nuova prescienta de L'Union dei Ladins da Fodom.

metuda a jì da L'Union auna a la festa de S. Cecilia. Chisc i inoms dei consiadous votei: Michela Devich, Emanuela Dorigo, Luigina Dorigo, Nives Faber, Manuela Ladurner, Oscar Nagler, Lorenzo Soratroi, Daniela Templari, Raissa Testor, Raffaele Irsara, Maria Teresa Crepaz.

A chisc se njonta l'raprejentánt del Comun, nciaria che ades l'é de Adele Denicolò. Nte la prima sentada del nuof consei, coche vòl l statuto, l'é ste fat fòra ence dute le nciarie del direttif. Vize

prescient sarà Luigina Dorigo. Riconfermei l secretèr Michela Devich e l cassier Nives Faber. Ntel consei direttif de la Generela jiarà la prescienta e la vize prescienta. Raffaele Irsara nveze l restarà come raprejentán de Fodom nte la Federazion dei Ladins daite dal Veneto, organism che no n'ha autra funzion che chëla de despartì i scioldi che la Region mèt per la mendranza ladina. I raprejentánc ntel Istitut Cultural Ladin Cèsa de Jan sarà: Bruna Grones e Luigina Dorigo per l consei cultural e la prescienta per l consei de amministrazion. Ntel consei ven fat fora ence de piccole comiscion che a da ste davò a dute le ativité ulache L'Union l'é mpegnada ntel ciámp de la cultura. Per la scola Daniela Templari e Luigina Dorigo, per i corsci Maria Teresa Crepaz, per i guànc Mnuela Ladurner, per l mujeo e biblioteca ladina Oscar Nagler, per la redazion de la Usc di Ladins Lorenzo Soratroi. Nte la prima sentada del nuof ann se scomenciarà bele a descòr del program de l'ativité del 2013. L prum laour bele comiscioné ai consiadou Mara Irsara e Raissa Testor sarà chël che renové e agiorné l scito internet de L'Union.